

IXAHER CATÊJÊ WÛR Jũm Jõ Kàhhôc

Ûhỹ, cute ihkàhhôc ita hôc catê te nee kam amji japry xir nare, ne ihhêj ne Pawrô te mõrmõ ihhôc. Ne Ixaher catêjê te Jeju to amji mã mehhimpej atajê cunea mã ri cute ihhôc ne ihkujahêc. Na ri ihkàhhôc ita japry te **Ixaher Catêjê Te Jeju To Amji Mã Mehhimpej Atajê WÛr, Jũm Jõ Kàhhôc** (Ixaher).

Pê ihhêj ne Ixaher na mehkwy nare atajê hacpyã mã Jeju na mehkwy to, mam menquêtjê te amji kam me hapac xà tũm ata wÛr ipipkjêr prãm. CwÛryjapê ri ihkàhhôc ita nee cute Jeju to amji mã mehhimpej jicu nare name cumã apô. Ne Jeju te amji kam hapac xà tuwti ita ri, mam Ixaher catêjê te amji kam hapac xà tũm ata jirôa pê impej. Ne ite nee Ixaher catêjê wÛr ihkàhhôc tẽ ita cunea to ipintuw nare, ne ihkwÛy jatujre atajê ri ite to ipintuw.

11

Pahte Pahpãm to amji mã me pahhimpej xà kôt harên xà

Ixaher 11.1-40

2 Petrô 3.5-7

¹ Ûhỹ me ikwÛy pê Juta catêjê pê Ixaher catêjê, wa ha me amã me ate Pahpãm to amji mã me ahimpej to hahkre, ne to capô, mãr ca me hahkre pej peytu ne. Quê ha Pahpãm te me pamã ampo to hũjahkre xà ata, cormã nee me pahwÛr

cator xà narecacrô, cu ha pahtỳj ampeaj kam, cormã me pamã hõr na amji mã me to hane, ne ihtỳj hikaj. Cu ha pahte Pahpãm to amji mã me pahhimpej na, quê ha ihtỳj mepamã ampo pupun xà nare ata te ihkrĩ na hahkre peaj to hahkre pej. Nãmri cu ha pahte Pahpãm to amji mã me pahhimpej nare na, cu ha nee me hahkre pej nare.

²⁻³ Ne cu Pahpãm to amji mã me pahhimpej, cwỳrjapê ri me pamã Pahpãm jarkwa kôt pjê me cõjkwa kam ampo cunea to amji ton nahahkre pej. Na ri me pamã, pahte nee me ampo pupun xà nare ata te ri ampo itajê cunea ton na hahkre pej. Nepê me panquêtjê ihtỳj Pahpãm to amji mã mehhimpej, cwỳrjapê ri Pahpãm te me to ihcakôc to impejti, ne me ahna amji caxàr.

Pê Ixaher catêjê quêtjê itajê ihtỳj Pahpãm to amji mã mehhimpej

⁴ Pê ajco Aper xwỳ Pahpãm to amji mã hane, cwỳrjapê ri Pahpãm mã cute Cãn xwỳ jirôa pê ampo jõr xà ata peaj to impej. Mã Pahpãm te, cute cumã ampo jõr xà ita na cupê catyt kam ipa catê na harên to impeaj to impej. Na pê ihtỳj ihkôt Aper xwỳ na amji capa. Ne pê ramã Aper xwỳ ty cacrô, mã cormã cute Pahpãm to amji mã ihmimpej xà ata, ihkôat me pamã to hahkre.

⁵ Pê Enoc hanea ne Pahpãm to amji mã hane, na pê ihcajpuaw pê Pahpãm ahna amji jarê, na pê nee pjêita kam ihtyc nare, pê Pahpãm amji mã ihtĩar na to api, pê nee hipêr jũ caxuw jũm cumã cator ne hõmpun nare.

⁶ Jũ wÿr cu Pahpãm to me pahte amji mã hajÿr nare xà ata kam ihcajpuaw. Quê ha jũm te Pahpãm wÿr hàhtêp na amji to hàhcukjêr na, quêha ihtÿj Pahpãm te ihkrĩ na amji mã to hane. Ne quê ha hanea ne caxwãm catia mã Pahpãm kôt me ipa prãmte ahna ahcukij, quê ha ihtÿj cute ahna hàhcukjêr ata jahpan xà na, cute ahna amji caxàr na amji mã to hane.

⁷ Pê Nowe xwÿ hanea ne ajco Pahpãm to amji mã ihmipej, na pê ihtÿj cumã, por rÿ nee jũm te ta catia pupun nare ata cawpa. Pê cute cumã ihcawpa xà ata kôt, amjimã pàr kreti to, mãr quê kaam mehkra me, amji to mehtyc xà jahpa. Mã ihkĩnte cute nee Pahpãm to amji mã mehhimpej nare atajê te amji curêmã me amji mên, ne mehcunea jamre. Mã Pahpãm te Nowe xwÿ te amji mã tohajÿr xà ata kôt ahna amji caxàr, ne cumã:

— Ate ikam gapac pejti, na ri apê catyt kam apa catê — hajÿr.

Aprãw pê cute Pahpãm to amji mã mehhimpej catêjê xakat

⁸ Pê Aprãw xwÿ hanea ne ajco Pahpãm to amji mã ihmipej to ipa, pê Pahpãm cumã jũ ri cute pjê to hõ tekjê xà ata to, hũjahkre xà ata na, amjimã to hane. Ne ma harkwa kôt, nee jũ ri cute hõ pjê ata jahkre pej nare kam, ihwÿr mō.

⁹ Pê Pahpãm Aprãw mã pjê to hũjahkre xà ata kôt, ihkôat ihwÿr mō ne curi cato, ne kam ihkrĩ. Ne hanea ne ihkra pê Ixac me, ihtàm xwÿ japyrÿ te Jaco ata me, kammehkrĩ. Ne pê hanea ne Pahpãm Aprãw tàm xwÿ tàm xwÿ

mã, menquêtti kôt pjê ata to awjahkre. Ne pê me cupê mehcahkriat, ne ajco pryre kà te ikre ata kam mehkri.

¹⁰ Ampo na? Nee mã ampo na nare. Pahpãm te me cumã amji ton xà ataa na, cute me cumã jũ caxuw krĩ jamre nare ata xãm na, cormã me hikaj.

¹¹ Pê Aprãw ramã ihweaj to ihwej, ne hĩxi pê Xarakwỳj ihkre crà cokrô, pê Pahpãm ahnaa cumã ihkra to awjahkre. Mã cute cumã ihkra tohũjahkre xà ata na amji mã to ihhimpej, ne ihtỳj hikaj, mã cumã ihkra pê Ixac pỳm.

¹² Hõ, pê hũmre pyxit peaj ne ajmãr ty, ata kôt ri mehtãmwxỳ jãhtôa to hàhtô, ne me cupê caxêre jãhtô pyrãac, nare, me cupêcôxwa tohkà na pjênxôm carôt jãhtô pyrãac.

¹³ Ne ite me amã me panquêtjê jarên xà kôt harên itajê ri, Pahpãm to amji mã mehhimpej to me ipa ita kam amehtyc. Ne nee cute me Pahpãm te me cumã ampo to hũjahkre xà atajê cwỳr nare kamamehtyc. Ne cute cormã me ampo cunea to Pahpãm te me cumã hũjahkre ata jarên par, ne nee cormã me hõmpun pej nare kam, ihhêj ne ramã cute me hõmpun, na ri ame hakry, ne ihtỳj ahna me amji jarên to me hane he:

— He nee me ipê pjê ita tekjê nare, ne me ipê mehcahkrit, na wa pjê nõa pĩn icator, ne ma ihnõ ita wỳr mõ — hane.

¹⁴ Ne cute me amji jarên xà ita kôt, cu ramã pahte me hõ pjêa japên na me hahkre pej.

¹⁵ Quê rỳ mã pjê pĩn me cator ata wỳr hacpỳa mã me amji jaxà, ne nee hipêr hacpỳ mã cute me amji jaxàr xà to ame amji kam hapac nare.

16 Ne quêt ame côjkwa jõ pjê impejti ata pit japên to me ipa. Ne atajê pê Pahpãm kra impeaj, na ri nee me hũ na ihpahàm nare. Na ri ramã cute me cumã côjkwa kam mehkri xà ata ton.

17-18 Pê Pahpãm Aprãw mã ihkra pê Ixac to hũjahkre to hane he:

— Ixac pê akra ita cucwa kam, quê ha amã me atàmxywỳ hàhtôa to hàhtô — hane. Pê Pahpãm Aprãw mã hajÿr cakrô, cute ihkra pê Ixac na capi prãmteihcuran na cumã harkwa. Mã Pahpãm jarkwa kôt ramã cute ihkra curan ne to caxàr xàa kam, cute amji mã harkwa to:

19 — Wa ha ihcura, quê ha ihtÿj Pahpãm hacpÿa mã ikra to ihtÿr — hajÿr. Mã Pahpãm te cute ihkra curan tète huwahi xà ata pê ihhêj rùm ramãhacpÿa mã ihtÿr.

20 Pê Ixac xwy hanea ne ajco Pahpãm to amji mã ihhimpej to ipa, na pê Pahpãm mã mehkra pê Jaco me Exaw tàmxywỳ te amji to me ipijapar xà na mehcajrên, ne me cumã:

— Quê ha Pahpãm ihtÿj jũ caxuw ato impej cati, me atàmxywỳ mea mã — hajÿr.

21 Pê Jaco hanea ne ajco Pahpãm to amji mã ihhimpej to ipa, na ri ramã ihtyc xàa kam, cute Pahpãm mã mehtàmxywỳ pê Joje xwy kra pijakrut atajê cajrên, ne ihtÿj cormã hàwkô ata na cute amji cajparne xa ne Pahpãm pejti na harên, ne to amji kampa.

22 Pê hanea ne Joje ajco Pahpãm to amji mã ihhimpej to ipa, ne ihtyc xà wÿr, mehkjêjê pê Ixaher catêjê te Ejit jõ pjê pê me cator na me cumã harê. Ne cute me cumã harkwa hyr, mãr quê jũ caxuw hacpÿ mã me amjijaxàr xà wÿr

mehhi to mõi, ne ma Pahpãm te me cumã pjê to hũjahkre xà ata ri me harêt.

²³ Pê Mojxe xwỳ pãm me inxi hanea ne ajco Pahpãm to amji mã mehhimpej to me ipa. Na pê Mojxe cumã ihpỳm, pê Paro xwỳ pê pahhi me ahkrare curan na me cumã harkwa ata kaj na, me to amxu. Ne pê ihkra ata impeaj to impej, pê me hõmpu, na pê nee amji mã me pahhi atacupa nare, ne cama me to ipimxur to putwrỳ incrê.

Pê Mojxe Ixaher catêjê mã cute mehkritxwỳ curan na to hahkre

²⁴ Pê Mojxe hanea ne ajco Pahpãm to amji mã ihhimpej to ipa, ne ihkà, ne ma apu cute me, cupê Paro kra cahãj ata kra na me harên na ihcaca.

²⁵ Na pê cute ampo kên cunea to amji cajpuaw to ipa xà to hatujre xà ata kam pê hicu, ne quêt ma mehkwỳ mã hàr na amji to. Ne me cumã axà ne me cahê na amji pupun xà kêanre to amji pupun to ipa.

²⁶ Ne pê amji mã:

— He quê ha ihtỳj jũ caxuw Pahpãm ite amji pupun xàita jahpan xà na hirôa pê imã amgõ. Na wa ha Ejitjõ pjê jãhcukrêj pejti itajêcunea to amji pê ijapac kêt. Ne Pahpãm te me pamã cute ampo kên cunea pê me pahpytâr catê to hũjahkre ata cwỳrjapê, wa ha cute ame icurê catêjêkam amji pupun to kêanre ne — hane.

²⁷ Pê Mojxe ajco amji mã Pahpãm to ihhimpej to ipa, na pê nee cumã pahhi pê Paro ata te kam incryc xà ata cupa nare, na pê ihtỳj Ejit jõ pjê pê mehkwỳ to cato, ne ma me to mõi. Ne me to

mõr xà ata kam, ihtỳjihhêj ne, por me Pahpãm pupun xà nare ata pupun to me mõ. Na pê kypê me cumã hũcanãr nare.

²⁸ Ne pê Pahpãm to amji mã ihhimpej, na pê me Hakrenxà jõ amji kїн to Pahpãm jarkwa kõt mehkwy mã ihhimpej, ne to hahkre. Ne amji kїн ata kam, pê ikre cunea kõt cute ame carà cahàcrekra pê mehkritxwy caprô jaxwyr na me cumã harkwa ta. Mãr quê ame haxwy, quê Pahpãm pїн ajpên me ahkrare cakônĩ curan catê ata tê, ne mehkritxwy caprô pupu, nenee mehkwy pê Ixaher catêjê nõ pê ihkra curan nare.

²⁹ Ne pê Ixaher catêjê hanea ne Pahpãm to amji mã mehhimpej, na pê ma Cõxwatepti cajpuw amcràre ata na me rê. Pê Ejit catêjê me cuxà ahna me irêr prãm cakrô, pê cama cô me hipej.

³⁰ Pê Ixaher catêjê Pahpãm to amji mã mehhimpej, na pê Cana jõ pjê mã me hàr xà ata kam, ihtỳj Pahpãm jarkwa kõt Krĩcuxwati ata pu na me ipijarõa to me amcro to xet, me ajkaam pê krĩ tète kwyc ata cunea apu ajxwy, ne pê kam mehkri catêjê atajê cunea jipej tu.

³¹ Pê Rapekwỳj xwy pê mempijapit xyre ata, ihtỳj Pahpãm to amji mã ihhimpej, na pê Ixaher catêjê te krĩ pupun catêjê atajê na amji capa, pê nee cute me Pahpãm par nare atajê kõt me cahãj ata curan nare.

Pê menquêtjê kwỳ te Pahpãm to amji mã me hajyr atajê, ihtỳj me ampo cwa

³² Hamre ramã ite me amã ijũjarên xà ita jamre. Ampo na? He ampeaj kam cute mam Pahpãm to amji mã mehhimpej catêjê jãhtô, na wa rỳ mã me amã Gitõ me, Parac me, Xãnxã me,

Jeta me, Tawi me, Xamer me, Pahpãm jarkwa to mehcahôc catêjê kwỳ jarẽ.

³³ Ne itajê pê hanea ne ajco Pahpãm to amji mã mehhimpej to me ipa, na pê krĩxàre kwỳ jõ pjê kôt ajco me ajpu ne me hipej, ne amji mã me hõ pjê atajêcunea pytà, ne me to hõ tekjê. Ne pê catyt kam, mehkrã kên me, mempej catêjê atajê to ajpên pê me ajcokjê. Ne pê ihtỳj Pahpãm te me cumã ampo to hũjahkre atajê incwa, ne ihtỳj amji tète me ropcahàcti jõkre hôhti ata jarkwa to me ajpỳ.

³⁴ Ne pê hanea ne mehkwy, cuhy kam cute me irên xà ata kam, ihtỳj cuhy pôc kam ame ipa, ne nee jũm caxàr nare. Ne pê hanea ne mehkwy, wapo xwahhihti to cute mehcuran xà ata pê me amji pytà, na pê neeme jũm curan nare. Ne pê mehkwy peacre atajê, carôt tỳj mã me axà. Pê mehkwy mã me hàprê xà caxuw ampeaj kam me carôt tỳj cati, ne pê ihtỳj krĩxàre jõ krãhtare jãhtôa ne ajco me tohjê.

³⁵ Ne pê pyjê kwỳ te ramã mehkjêjê tyc atajê tĩar na hacpỹ mã amji mã me huwahi.

Catyt kam Pahpãm kôt ame ipa atajê, ihtỳj me amji pupun xà to kêanre

Ne pê mehkwy hanea ne Pahpãm to amji mã mehhimpej cacrô, ihtỳj cute amji pupun xà kêanre to me amji pupu. Ne ma me amji mã hikran caca, ne ihtỳj Pahpãm cwỳrjapêamji na me curê xwỳn jamã, mã me cumã mehkàj xà ton to me ipa ita to mehcura. Ne pê ajco mehkàj xà na me amji pupun xà ata kam me amji mã:

— Quê ha ihtÿj Pahpãm ite incwÿrjapê amji pupun xà kêanre to amji pupun xà ata jahpan xà na, hacpÿa mã cute ito itĩr xà ata kam, hirôa pê imã amgõ — hane.

³⁶ Ne pê mehkwy na cute me xwÿ xà kêanre xà atajê to me cumã ihpahàm catia to, ne mehcahÿr xà kêanre to mehcahÿ. Ne wakÿre te mehcajpre xà to mehkwy cajpre, ne me hacjên xà kam me hacjê.

³⁷ Ne pê kên to mehkwy capê ne to mehcura. Ne pĩ cokjêr xà to mehkwy tĩar kam mehcokjê. Ne pê wapo xwahhihti to mehkwy cura. Ne pê mehkwy pê hamreare, pê me curê xwÿn cama ame hahêr to mehcapôrto me ipa, ne ame to kêanre, pê ajmãr mehcakrô ame ipa, ne prykà to pit mã me amji pro to me ipa.

³⁸ Ne kên me pôti kam me hamreare ata kam me acto ne ihtÿj kên kre me, pjê kre kam ajco amehkrĩ. Ne Pahpãm mã pjê kam mehcunea mehkrĩ atajê jirôa pê quêt mempeaj to mempej.

³⁹ Ne atajê cunea, pê ihtÿj Pahpãm to amji mã mehimpej to me ipa, na pê Pahpãm mã mempej pit, pê me ahna amji capa cakrô, pê nee cormã cute me, por Pahpãm te me cumã ampo to hũjahkre ata cwÿr nare.

⁴⁰ Ampo na? Pahpãm mã cormã cute me ampo cwÿr xà ata jôr xà nare, quê ha cormã me to me pajikaj, mãr cu ajkaam, Pahpãm te ihcuneana me pahto impej prãmte me pamãhãmjôr xà impejti catia ata to me pamã amgõ.

*Cu ha menquêtjê cuxà, me pahte amji pupun
xà kêanre ata mã me awcanã*

Ixahe 12.1-29

Pirip 3.12-16

¹ Ne mam me panquêtjê amji mã me Pahpãm to mehhimpej to me ipa catêjê atajê jàhtôa picarõ, cormã ihtýj me pahkôpîr to me ipa. Ne cute Pahpãm to amji mã mehhimpej xà atajê ihhêj ne ihtýj me pamãhàpôr to me ipa. Pom hãn ne me ipicahur curê, ne me hàhcukrêj me, ampo cunea pytîti me, ampo te mehcahpêrkâr xi atajê cunea jicu, nemehcakrô me ajcahu, ita jîkjê na, cu ha amji pê me ampo kên cunea me, ampo kên te me pahcupu xi atajê cunea jicu, mãr quê nee ampo me pahcahpêrhÿr nare kam, catyt kam Jeju to amji mã me pahhimpej kam me to pancrà.

² Ne pom me ipicahur catêjê amji cumam memprar xà mã catyt kam me irît to me pra, ita jîkjê na, cu ha Jejuato pit mã amji mã me pahhimpej to mepapa. Ampo na? He taa mã pê mam Pahpãm jô pry kam me paxãm. Ne taa mã pê pahte amji mã me to pahhimpej na me pahto. Ne taa mã quê ha ampo cunea jicu xà kam me pahtehcajpa, mãr cu nee pahte amji mã me to pahhimpej xà ata jicu nare. Ne pê Jeju pjê ita kam ajco apu ipa, ne nee pî kam ihtyc xà ita tète amji hi kwîñ nare. Ne ihtýj cumã jũ caxuw hakryti na amji jahkre pej, na pê ihtýj ihtyc xà kêanre kam ihpahàmti ita mã awcanã. Na ri amcro ita kam ihtýj Pahpãm cahê na, awpôc rûm Pahhitikrî xà pê me hàmtàr cati krî xà ata kam jÿ.

³ He Jeju te amji pupun xà kêanre to amji

pupun, pê mehrã kên hàhtôa ne ma ame curê cacrô, pê ihtýj awcanã na, to ca me amji japackre, mâr ca cuxà, nee ampo kên cunea mã gũcanâr tête me amjihi kwĩn, ne Pahpãm kôt me apa jicu nare.

⁴ He nee cormã mehrã kên te amji kam hapac xà kênre pê, ate me amji pytâr xà ita kam, nee rý me anõ caprô pijaxwýr nare. Ne neejũm te cormã me anõ curan nare.

⁵⁻⁶ He pê ramã Xarômãw xwý, cute me amã acarôt to ihtýj xà caxuw, Pahpãm jarkwa na hõ kàhhôc kam me amã ita na ihhôc, ca ramã ihhêj neate me to gapac kêt! He pê me pajapackre to:

“Ikra, quê ha Pahhiti pê Pahpãm mã jũm kĩn, quê ha ihtýj jũm ata japackre xà to ihcãmxê, mâr quê catyt kam ihkôt ipa.

Ne quê ha Pahpãm jũm to ihkra xà na ahna amji capa,

ne ihtýj cute ampo kên ton tête cumã,

ne cumã ihkàj xà to, mâr quê catytkam ihkôt ipa.

Na quê ha jũ caxuw Pahhiti akàj xà nã to acãmxê, ca ha atýj cute acãmxêr xà ata na ihkôpĩ, ne ihkôt hakop.

Ne quê ha ampo tête amã,

ca ha cute amãn xà ata kam,

ihkôt apa intête amji hi kwĩn nare” hane.

⁷ Na quê ha ate me amji pupun xà kênre me akam ajhu, ca ha atýj me cumã awcanã. He ate me amji pupun xà kênre itajê pê, pom hãn ne mehũmxwý mehkra japackre he. Ne ate me amji pupun xà kênre itajê, ihtýj ramã

me apê Pahpãm kra na me garẽ. He xà ajkĩ cute mehkra japackre xàcaxuw me hũmjê me hamreare? Hãpà. Cute me hapackre xà caxuw ihtỳj me cumã me hũmjê me, menquêtjê.

⁸ Ne pom krô na mehkra, mã nee me hũmjê me hapackre, ne mehcãmxe nare, mã amjia kôt me amji to ajpa, ita jĩkjê na, quê ha Pahpãm nee jũ caxuw acãmxe nare na, ca ha nee apê ihkra impej nare.

⁹ He pê me pajökrenõre na ihtỳj me pahcũmxwỳ ajco me pajapackre, ne me pahcãmxe, na pê cu pahtỳj ajco amji mã me hũpa. Cwỳrjapê cu ha ita caxuw me hirõa pê amji mã me cõjkwa kam me pajõ Inxũ Cati cupa. Necute me pahkàj xà to me pahcãmxe, na cu ha pahtỳj me kampa, ne me awcanã, mãr cu cahê na me pahkrĩ rohnỳtti mã.

¹⁰ Pê me pahcũmxwỳ, me pantuwre na, caku crêre kam, jũ na cute amji mã me pahto prãm xà ata na ajco me pajapackre, ne me pahcãmxe. Ne Pahpãm te nee quêt hajỳr nare. Ne cute me pahto impejti xà caxuw ri me pahcãmxe, mãr cu me papê hũràac, ne me pampeaj to me pampej.

¹¹ He pê me pahcũmxwỳ me pahcahhyr xà ata kam, pê nee me pamã ahna ihkĩn nare cakrô, cu pahtỳj cute me pahcahhyr xà atajê kôt catyt kamame papa, ne me pampej pẽa mã me amji to ajpa.

Cu ha pahtỳj Pahpãm kôt me papa rohnỳtti mã to prãm

Carati 5.16-21

12 Cwÿrjapê, quê ha ate me amji pupun xà kêanre me awÿr hapôj, ca ha nee Pahpãm kôt me apa tête me amji hihkêhkên nare, ne cama quêtcaxuw amji mã me acarôt to mehtÿj.

13 Na ca ha atÿj gôtpê catyt kam Pahpãm te amji kam hapac xà kôt apa, mãr quê ihtÿj jũm akôt mō ata, nee akôt amji cahpêrhyr, ne Pahpãm kôt ipa tête amji hi kwîn, ne hïcu nare.

14 Ne catyt kam mehcunea me, me apijapu to me apa na me amji to prãm nare na, ca amji to me ahcukij. Ne catyt kam ate amji kam me gapac xà impejti to me apa na, ca me caa amji to me hahkre. Nãmri quê ha jũm te ihcunea na catyt kam, cute amji kam hapac xà impejti to ipa nare na, quê hanee jũ caxuw Pahpãm pê Pahhiti pupun nare.

15 Ne ca ha ma me ajpên jamã, mãr ca nee me anō Pahpãm jãhcaprĩhti ata cwÿr jïcu nare. Ne nee ca me akwÿ kam, jũm te amji kam hapac xà kênto ipa na hamãr nare. Ampo na? Por jũm te amji kam hapac xà kên ita pê ihhêj rũm pjêpjêcrejĩ pyrãac. Ne por mehcunea pjêpjêcrejĩ na me pra atajê, quê ha mehcunea caxwÿ, quê ha me kàj xà partu. Jĩkjê na, quê ha mehcunea jũm te amji kam hapac xà kên ata têt, ne ramã ihkên mã hàr pyrentu.

16 Ne nee ca me akwÿ kam, jũm te amji kam hapac xà xyre kam pahpahãmti ton to ipa na hamãr nare. Ne nee ca jũm pê Exaw xwÿ te amji mã Pahpãm te amji kamhapac xà cupa nare pyrãac ata na hamãr nare. He pê Pahpãm Exaw xwÿ mã ampo pej cunea gō, pê to hō tekjê. Ne ampo atajê to hō na crat pyxiti peaj na to ahpa.

17 Jirô pê hapu na ihkrã kre mã ihpým, ne te haczỹ ne apu Pahpãm te cumã ampo pejti jõr ata pyr to hahkre, ne te incwýar kam haczỹ ne ahna ahwý cakrô, nee haczỹ ne cute ipyr xà nare na, ramã me amã hahkre pej.

Pê Ixaher catêjê Pahpãm wýr me hàhtêp xà ata ihtýajto ihtýj

18-21 Pê Ixaher catêjê, põti kam me hamreare ata kam, Pahpãm wýr me ahtêp, ne ma kên japry te Ihcuhhyt ata na me cato. Ne mento jãa to me cuhy catia pupu, ne mehcajpẽ. Ne cute me awcapàtkôti catia pupun. Ne cuteme kôcti catia pahtýjti ata cajpër. Ne cute me hapac jãa to me cõjkwa pîn hõhhi jõkre krãhhi ihtýjti ata kam hapac, ne hanea ne cute me Pahpãm te ihcakõc na me kam hapac. Ne hanea ne cute me Pahpãm jõkre kam hapac, ne ampeaj kamme cumã hũpa. Na ri cute mehwyr, quẽ nee hipêr ihcakõc quẽ mempar nare. Ne Ihcuhhyt ata kam pê Pahpãm me cumã ihcakõc, cwýrjapê ri ihtýj cute amji mã me hũpa xà. Cwýrjapê pê Pahpãm me cumã kên ata cawpa to:

— Nee me anõ te kënti ita cupên xà hamreare, ne nee hanea ne ampo pry te ihcupên xà hamreare. Quẽ ha ampo pry ihcupê, ca ha me caa, me kên kwý cwa ne to me capê, ne to mehcura — hane. Mã hũpa te, cute nee me cumãharkwa hyr xà ita na me amji caxàr, ne kam me hapac prãm nare. Mã Mojxe te ampo itajê cunea pupun, ne cute ahna amji jarên to:

— Wa itýj ampo itajê cupate apu itertet — hane. Hõ, pê Ixaher catêjê Pahpãm na me ahtêp

xà ata kam, pê me to hane. Ne nee quêt ate me hajÿr nare.

Pahpãm wÿr me pajàhtêp xà quêt ihcajcucre, ne nee ihtÿj nare

²² Ne ca Pahpãm na me gàhtêp xà ata kam, ca ihhêj ne còjkwa kam Xijãw jô kên pupun xà nare ata na me gàhtêp. Ne por còjkwa kam Krĩpinkrên pê Pahpãm tĩr rohnÿtti mã ata jô krĩ na, ca me gàhtêp. Ne còjkwa kamkrĩ ata kam, ampeaj kam Pahpãm mã me hàpên catêjê jàhtôa to me hàhtô, ne me hakrya kam curi me cuprô.

²³ Ne hanea ne Pahpãm na mehkwy ìhkôt me ipa atajê, ramã Pahpãm te cahê na me ipa xà caxuw còjkwa kam, hõ kàhhôc kam me haprÿ nôr atajê na me gàhtêp. Ne hanea ne Pahpãm pê catyt kam, me pahcukij ne ajpên pê me to ipicokjêr catê ata na me gàhtêp. Ne ca hanea ne, por pê ihcunea na catyt kam ajco me ipa, ne ramã amehtyc atajê na, me gàhtêp.

²⁴ Ne hanea ne Jeju te Pahpãm me, me pahte ajpên par to intuwti ata na me gàhtêp. Ne Jeju caprô te ihhêj rÿm me pahkên cuhhôn, ne me pahpytâr. Ne pê Aper xwÿ caprô, ihtô te ihcuran jahpan xà na, Pahpãm na cute to kên prãmte ahwÿ. Ne nee Jeju caprô te hajÿr nare. Ne quêt cute mehcunea caprĩ xà caxuw, Pahpãm na hàhwÿr.

Cu ha nee me pahte Pahpãm par nare na, quê ha ihtÿj me pahto kên

²⁵ Cwÿrjapê ca ha nee amji pê Pahpãm jarkwa curê nare, ne quêt kam me gapac to impeaj ne. Pê Pahpãm mam pjê wÿr wrÿ, ne me aquêtjê

mã amji cawpa. Pê nee me kam hapac nare, ne cama mehkêanre ton to ajco me ipa, na pê nee jũm Pahpãm te me to kên xà ata pê amjipytâr ne hàhhuc nare. Japu na ri ihtỳj còjkwa pĩn Pahpãm me pamã amji cawpa. Cu nee mempar nare ita kam, cu ha pijamã me pahnõ Pahpãm te me pahto kên xà ata pê amji pytà? Quê! Cu ha pahtỳj me cuxà, me hirõa pê me pahkên mã me acjêj.

²⁶ Ne amcro ata kam pê Pahpãm ihcakôc, pê pjê ahcujrõ. Ne ita kam ri quêt cute me pamã amji to hũjahkre to hajỳr he:

— Wa ha nee hipêr ita caxuw pjêê to pit mã ijàhcujrõn nare, ne jũ caxuw còjkwa mea mã to ahcujrõ — hane.

²⁷ Ne pom icakôc xà pê “...hipêr ita caxuw...” ita kôt harên xà te, quê ha Pahpãm cute ampo cunea ton itajê to ahcujrõ, ne ihcunea to hamre tu, mãr quê ampo cunea jàhcujrõn te ampo to hamre xà nare atajê, ihtỳj ahtwỳ ne ihcuhê.

²⁸⁻²⁹ Ne quê ha Pahpãm ihhimpej xà krac ri me pamã, me pahkrĩ xà jàhcujrõn te to hamre xà nare ata gõ, cu ha kam me pahkrĩ rohnỳtti mã. Na cu ha pahtỳj hũrên me pajakryti na cumã me amji jarê. Pahpãm pècuhy catia te ampo cunea to hamre xà ata pyràac, cwỳrjapê cu ha pahtỳjhũpahti kam, catyt kam cumã cati, ne impejti na me harê.

13

Cu pahtỳj me ajpẽn kĩn kam me to pancrà to

prãm

Ixaher 13.1-25

1 Jowãw 3.17-18

¹ Ca Jezu kam ajpẽn to me akjêjê ita kam, caha atỳj me amã ajpẽn kїн kam me to acrà tu ne.

² Ne ca ha atỳj mehcahkrit na me amji to pøj kam meto acrà tu ne. Ca ha ate me ita to hajỹr na, ca ha me apê mam me aquêtjê pyràac, ne pê mehkwy, kỳj rूंm me Pahpãm mã me hàpên catêjê na me hahkre pej narekam, ihtỳj me hũrkwa kam me ahna amji to pøj.

³ Ne ca ha me hacjên catêjê to ma me amji japackre, ne mehtehcajpar to hanea, pom ca ihhêj ne me cahê na me acuhhê he. Ca ha cute me amji pupun to kêanre atajê jamãr to me apa to hanea, pom ca me caa ateme amji pupun xà kêanre to me amji pupun he.

⁴ Ne ate me gikwa tuw xà na ateme ajpẽn par xà atajê, ca ha atỳj amjimã me hũpahti to me apa. Na ca ha me apê mempjê me, me apê mehprõ, ca ha ate mam me ajpẽn par xà ata na, ma me amji jarkwa to me amji japackre to me apa. Ne nee jũ caxuw ahti na, me aprõ me, me apjê kaj na ate jूंme ajpẽn caxun to amji kam me gapac xà hamreare. Ampo na? He quê ha ihtỳj Pahpãm, por jूंm ahti na jूंm caxun to ipa ata, to kêanre ne. Ne hanea ne, por jूंm te amji kam hapac xà xyre kam me pahpahãmti ton to ipa ata, quê ha hanea ne apu to kêanre ne.

Cu ramã me pamã ampo atajê pyrên ri me pajakryti to prãm

⁵ Ne nee hanea ne, ame ihpore pit kîn to me apa ata kam, me gõ pore incwÿr xà to pit mã me amji kam gapac to me apa nare. Ne pom ramã me amã ampo atajê pyrên, ca ha atÿj me gakrya na ame apa. He pê Mojxe xwÿ jõkàhhôc kam, Pahrãm ramã me ana ita na amji jarên to:

“Wa ha nee jũ caxuw me arer nare, ne nee jũ caxuw me amã hikran nare” hane.

⁶ Pahrãm te me ana amji jarên xà ita cwÿrjapê, cu ha pahtÿj Tawi xwÿ jõ kàhhôc kam, cute amji jarên xà ata kôt, me amji jarên to:

“Pahhiti pê Pahrãm pê itehcajpar catê ita kam, jũwÿr quê ha jũm amji mã hamã ne ito kên, na wa ha nee apu amji mã pa nare” hane.

⁷ Ne mam cute me ato ihhimpej catêjê te me amã Pahrãm jarkwa to hahkre na, ca me to amji japackre. Ne cute amji kam me hapac xà me, mehtyc xà na me to amji kampa, ne mehkôat Jeju to amji mã me ahimpej to me apa.

⁸ Ne nee jũ caxuw Jeju Crixto pintuw xà nare. Ne amcro itajê kam, cupê mam Jeju ataa, ne quê ha cormã cupê Jeju ata rohnÿtti mã.

⁹ Ca ha nee ite me amã Jeju te amji kam hapac xà pejti to hahkre xà ata kaj na, jũmjê te me amã ajteare mã ampo pihho to hahkre xà ata kôt, amjikam me gapac nare. He Pahrãm ri hàhcaprĩa kam, me pamã pahte amji kam me pajapac xà to ihtÿj ne to impej. Ne jũ wÿr quê me panquêtjê te amji kam hapac xà te me pamã me

pajõ cawpa xà ata, me pamã me pahte amjikam pajapac xà to impej. Ampo na? Por cute amji mã me hõ cawpa xà ata me, me ipijacri xà atajê cunea kôt hamreare.

Jeju ihtỳj me pamã pahte amji kam me pajapac xà to ihtỳj

¹⁰ Ne por Krĩpinkrên kam Pahpãm mã mehcajrên catêjê Pahpãm jũrkwa kam cumã me ampo pry to caxàr to me ipa atajê, ihtỳj cute ampo pry to me ipijapar xà ata to me Pahpãm kam hapac atajêkwỳ ku, mã me hĩ to pit mã ihtỳj, ne nee me cumã caxwãm pê cute amji kam me hapac xà to ihtỳj nare. Ne me pa nare, he ihtỳj quêt Jeju me pamã pahte amji kam me pajapac xà to ihtỳj. Mã nee Pahpãm jũrkwa kam cumã me hàpên catêjê atajê te ahna me pahho xà hamreare.

¹¹ Ne Pahpãm mã mehcajrên catêjê jõ pahhiti caku cunea jõ amcro pyxit kam, cute me Pahpãm to kên jahpan xà na, me ampo pry cura atajê caprô to Pahpãm jũrkwa caxwỳn pejti ata mã acjêj, ne Pahpãm mã cupê. Ne por cute me ampo pry curan atajê jĩ to ma krĩ pê me hapôj, ne curia me to capa.

¹² Cwỳrjapê ri cute me ampo pry curan kôpit na, krĩ kaj na Jeju tyc, mãr quê caprô to me pamã me pahkên cuhõ.

¹³ Hỳ cu me papê hũràac, ne cuxà krĩ ita kam cute me amji kam hapac xà tũm itajê mã me hikra, ne Jeju kôt põ mã me pahcato. Quê ha me pahpahàmti na me pahto, cu ha nee ame pahpahàm nare. Ampo na? Pê Jejuto me hanea, ne me pahcumam me cumã ihpahàm catia to.

14 Ne me pamã pjê kam krĩ itajê nõ jàhhuc rohnýtti mã xà hamreare, na cu ha pahtỳj còjkwa pĩn Pahpãm te me pamã krĩ kam me pahkrĩ rohnýtti mã xà jør xà ata japê.

15 He Jeju Crixto kôt ri, Pahpãm na me pajàhtêp xà, ne nee cumã ampo pryre to me ipijapar ata jør xà kôt ahna me pajàhtêp xà nare. Cwýrjapê cu ha me Pahpãmmã cupê me pajõ Pahhiti cati ne impejti na hūrên me pajakryti na, cumã me amji jarên to me pahcuhhê tu. He pahte me to hajýr xà ita pê pahte cumã ampo jør pyrãac, na quê ha ihtỳj me pahpyrên hakryti ne.

16 Ne hanea ne gòtpê atỳj me ajpên tehcajpar to meajpên to impejti to me apa. Ampo na? He ita te hajýar ne cupê ate Pahpãm mã ampo jør xà. Naquê ha hanea ne ihtỳj hūrên hakry.

Cu pahtỳj me pahto ihhimpej catêjê Pahpãm mã mehcajrên to prãm

17 Na ca ha atỳj me akwỳ kam me ato ihhimpejcatêjê krac ri me acjêj, ne me kampa, ne catyt kam ihkôt me apa. Ampo na? He ihtỳj cumã jũ caxuw cutePahpãm mã me ana amji jarên na cumã hahkre pej, na ri ihtỳj me gamãr to me ipa. Ca ha ate me kam gapac na, quê ha ampeaj kam cute me gamãr xà ita pyrên hakry, nãmri ca ha ate me kam gapac nare na, quê ha cumã amji kĩn nare kam, me gamãr to ipa. He ate me hajýrxà ita te nee me atehcajpar xà hamreare.

18 Ca ha atỳj Pahpãm mã me icajrên kam to acrà tu ne. He ihtỳj jũmjê ampo kên na me icãmjĩ cacrô, wa Pahpãm kam mare mã catyt kam me ipa na, me imã amji jahkre pej. Ne me

imã ihcunea na catyt kam me ipa kam meto icrà tu na me amji to prãm.

¹⁹ Ne wa ha kypê me awÿr nare, mâr ca Pahpãm mã me icajrën, wa me awÿr amji jaxàr to amji to ijàhtũm nare, ne amji jaxà.

Pê Pawrô Pahpãm mã mehcajrẽ

²⁰⁻²¹ Jeju pê me pajõ Pahhiti, ne me pancwÿrjapê ihtyc xà ata kôt ri, cupê carà cahàcre hôhti jamâr catê catia pyràc, ne cupê me pajamâr catê catia. He Jeju pê me pahkritxwÿ caprô pijaxwÿr xà ata te ihtÿj Pahpãm te me pahkên pê me pahpytâr rohnÿtti mã na harën. Pê Pahpãm hacpÿa mã Jeju to ihtÿr. Pahpãm te me pahcarÿcti kam ame papa na me pahton, mâr cu nee ameamji mã am pocupa nare ata mã, wa me acajrën to hane he:

— Me ijõ Inxũ Cati, Juta catêjê pê hanea ne Jeju na mehkwy atajê tehcajpar to impeaj ne, mâr quê ate am pocunea na amji mã to prãm ti xà te acajpuaw xà ata to pit mã, me to me ipa. Ne hanea ne akra Jeju Crixto kôt me imã ite amji kam me ijapac xà to impeaj ne, mâr waih cunea na me acajpuaw. Ne me imã mehcunea te akra to acatia to cati na to prãm rohnÿtti mã. Ampeaj kam! — hane.

Ihkàhhôc jicu xà kam cute amji jarën xà

²² Ýhÿ Jeju kam me ikjêjê, wa ite me amã ihkàhhôc jatujre ita hôc, mâr ca ite me gapackre xà itajê kam me amã amji kÿan kam, me kam gapac to impeaj ne.

²³ He xà ramã me amã, cute me hacjên xà pê me pahkjê pê Timot cator na, me amã hahkre

pej? He ramã cute me cator. Na quê ha iwÿr cute uua ne itari cator na, wa ha me ajwar me awÿr me mõi ne me apupu.

²⁴ Ne wa ha cute me ato ihhimpej catêjê me, me cupê Pahpãm na mehkwÿ cunea mã me ijõ hàpà kujate. Ne ita ri, me pahkjêjê kwÿ pê Prytikra jõ pjê catêjê te me acunea mã me hõ hàpà kujahêc.

²⁵ Ne imã Pahpãm te hàhcaprĩa kam me acunea to impej na to prãm.

PAHPÃM JARKWA CUPAHTI JÕ KÀHHÔC
Canela: PAHPÃM JARKWA CUPAHTI JÕ KÀHHÔC
(Portions)

copyright © 2012 Wycliffe Bible Translators, Inc.

Language: (Canela)

Contributor: Wycliffe Bible Translators, Inc.

All rights reserved.

2020-11-16

PDF generated using Haiola and XeLaTeX on 1 Oct 2024 from source files
dated 29 Jan 2022

09d4e460-c38b-52b7-81c1-8300bfeb466a